

Na osnovu čl. 3. i 5. Zakona o prenosu poslova medijacije na udruženje medijatora (Službeni glasnik Bosne i Hercegovine broj 52/05), u vezi sa članom 31. stav 2. tačka c) Zakona o postupku medijacije (Službeni glasnik Bosne i Hercegovine br. 37/04), te na osnovu člana 20. Statuta, Upravni odbor Udruženja medijatora u Bosni i Hercegovini donosi

PRAVILNIK O REGISTRU MEDIJATORA

Član 1.

Ovim Pravilnikom propisuje se: uspostavljanje, uvjeti za upis, način vođenja i brisanje iz Registra medijatora Udruženja medijatora u Bosni i Hercegovini.

Član 2.

Udruženje medijatora u Bosni i Hercegovini (u daljem tekstu: Udruženje) vodi evidenciju o medijatorima u obliku knjige pod nazivom "Registar medijatora" (u daljem tekstu: Registar). U Registar se unose sljedeći podaci: redni broj upisa, prezime, ime jednog od roditelja i ime medijatora, njegovo prebivalište, adresa stanovanja i uslužni telefonski broj, zanimanje, a ako je zaposlen naziv poslodavca, broj i datum rješenja o upisu, broj, datum i razlog brisanja iz Registra, datum i mjesto davanja svečane izjave i napomena.

Uz Registar se prilažu rješenja i ostali relevantni dokumenti o medijatorima, kao i potpisani tekst svečane izjave iz člana 11. ovog Pravilnika.

Registar je javna knjiga, a izvodi iz Registra i potvrde izdate na osnovu podataka iz Registra su javne isprave.

Medijator je dužan o promjeni podataka iz stava 2. ovog člana obavijestiti Udruženje odmah, a najkasnije u roku od osam dana.

Član 3.

Pravo na obavljanje poslova medijatora stiče se danom upisa u Registar. Registar iz stava 1. ovog člana vodi Udruženje.

Član 4.

Ne može se uskratiti pravo na obavljanje poslova medijatora zbog: nacionalne, etničke, vjerske, političke ili polne pripadnosti.

Član 5.

Pored opštih uslova za upis u Registar, predviđenih članom 31, stav 1. Zakona o postupku medijacije, kandidat mora ispunjavati i sljedeće posebne uslove:

- VSS
- završena obuka prema programu Udruženja ili drugog programa obuke koji priznaje Udruženje
- zadovoljavajuća ocjena intervjua
- članstvo u Udruženju.

Član 6.

Uz zahtjev za upis u Registar, kandidat je dužan priložiti:

- uvjerenje o državljanstvu Bosne i Hercegovine
- kratku biografiju
- dvije fotografije
- dokaz o uplati takse na zahtjev
- dokaz o plaćenju članarini Udruženju za tekuću godinu
- uvjerenje da se ne vodi krivični postupak
- diploma o završenom fakultetu

- adresa i kontakt telefon
- certifikat o završenoj obuci prema programu Udruženja ili potvrdu Udruženja o priznanju drugog programa obuke

Član 7.

Upravni odbor Udruženja objavljuje javni poziv za upis u Registar u “Službenom glasniku BiH” i u tri najtiražnije dnevne novine koje se distribuiraju na teritoriji Bosne i Hercegovine u pravilu jednom godišnje.

Član 8.

Upravni odbor Udruženja može zatražiti da podnositelj zahtjeva za upis u Registar dopuni dokaze o ispunjavanju određenih uvjeta, određujući mu rok za postupanje po zahtjevu. U slučaju da podnositelj zahtjeva ne postupi u roku iz stava 1. ovog člana, smatrat će se da je odustao od zahtjeva.

Član 9.

Prije odlučivanja o zahtjevu za upis u registar obavlja se intervju s kandidatom pred Komisijom za provođenje intervjua iz poznavanja Zakona o postupku medijacije i Zakona o prenosu poslova medijacije na udruženje medijatora, Statuta Udruženja, Kodeksa etike medijatora i drugih akata Udruženja.

O ishodu intervjua sačinjava se zapisnik sa konstatacijama: “zadovoljio” ili “nije zadovoljio”.

Član 10.

Upravni odbor Udruženja će u roku od 8 dana od obavljenog intervjua iz člana 9. ovog Pravilnika donijeti rješenje o zahtjevu za upis u Registar.

Pismeni otpis rješenja iz stava 1. ovog člana dostavlja se podnosiocu zahtjeva.

Rješenje iz stava 1. ovog člana je konačno, ali se protiv njega može pokrenuti upravni spor pred Sudom Bosne i Hercegovine (u daljem tekstu: Sud).

Član 11.

Upis u Registar će se izvršiti na dan kada je utvrđena pravosnažnost rješenja o upisu u Registar i nakon potpisivanja svečane izjave, koja glasi:

“Izjavljujem da ću dužnost medijatora vršiti časno i savjesno po svom najboljem znanju i da ću u radu postupati u skladu sa zakonom i principima medijacije.”

Svečana izjava iz stava 1. ovog člana se potpisuje pred predsjednikom Udruženja.

Tekst svečane izjave iz stava 1. ovog člana čuva se u Udruženju.

Član 12.

Upis u Registar vrši se na osnovu rješenja Upravnog odbora Udruženja i dokaza o izvršenoj uplati upisnine.

Medijator je dužan u toku kalendarske godine pohađati najmanje dva dana stručne obuke, koju organizuje Udruženje. Ovoj obuci ne podliježu medijatori koji su kao treneri učestvovali u provođenju te obuke.

Član 13.

Nakon izvršenog upisa izdaje se legitimacija medijatora, koja sadrži: naziv Udruženja, znak Udruženja, riječi: “Legitimacija medijatora”, ime, prezime, fotografiju, redni broj, datum upisa u Registar i datum izdavanja.

Legitimacija medijatora ovjerava se pečatom Udruženja otisnutim djelimično preko donjeg desnog ugla fotografije i potpisom predsjednika Udruženja.

Medijator je dužan prijaviti svaku promjenu podataka i zatražiti izdavanje nove legitimacije.

Troškove izdavanja nove legitimacije snosi medijator.

Član 14.

Upravni odbor Udruženja donosi rješenje o brisanju medijatora iz Registra. Rješenja iz stava 1. ovog člana su upravni akti protiv kojih žalba nije dozvoljena, ali se može pokrenuti Upravni spor pred Sudom.

Član 15.

Rješenje iz člana 14. ovog Pravilnika donosi se ako medijator:

- izgubi državljanstvo Bosne i Hercegovine u kojem slučaju će se brisanje izvršiti sa danom pravosnažnosti rješenja kojim je utvrđen gubitak državljanstva,
- izgubi radnu sposobnost u kojem slučaju će se brisanje izvršiti sa danom pravosnažnosti rješenja kojim je utvrđen gubitak radne sposobnosti,
- izgubi poslovnu sposobnost u kojem slučaju će se brisanje izvršiti sa danom pravosnažnosti rješenja kojim je utvrđen gubitak poslovne sposobnosti,
- umre, u kojem slučaju će se brisanje izvršiti sa danom smrti medijatora,
- mu je izrečena disciplinska mjera zabrane obavljanja poslova medijacije, u kojem slučaju će se brisanje izvršiti sa danom pravosnažnosti rješenja o izricanju disciplinske mjere,
- izjavi da više neće obavljati poslove medijacije, u kojem slučaju će se brisanje izvršiti sa danom pravosnažnosti odluke o brisanju,
- osuđen na безусловnu kaznu zatvora u trajanju od 6 mjeseci ili duže za krivično djelo koje ga čini nedostojnim za obavljanje poslova medijacije, u kojem slučaju će se brisanje izvršiti sa danom pravosnažnosti osuđujuće presude.

Član 16.

Ovaj Pravilnik stupa na snagu narednog dana od dana objavljivanja u "Službenom glasniku BiH".

27.2.2006. god.
Banja Luka

Predsjednik Udruženja
Goran Salihović
